


"Pa Papai", di pen di "Padu" pa cassette y awe cu "Angelo" riba C.D.



Binti dos aña pasa **"Padu del Caribe"**, Padu Lampe, a haci un gesto masha bunita na un hobencito cu tabata gusta canta y cu tabata tin bunita voz y a regala **Angelo M.C. Koolman** e cancion bunita, **"Pa Papai"**.

Padu tabata tin e cancion warda varios aña y e hobencito **Angelo**, despues di a haya esaki, a graba e cancion riba cassette.

Te awe ainda riba **Dia di Tata**, **Angelo** ta canta e cancion aki den misa cu su coro **Novi - Cantores**.

E aña aki **Angelo** a dicidi di graba e cancion riba C.D. na **I.Q. Musiclab** cu semper ta cla pa duna **Angelo** su mihor contribucion y servicio.

Angelo a keda masha contento cu e resultado final di e cancion den un bachi nobo.

Mi a busca un copia di e CD pero a haya e CD mes regalo di **Angelo** y no por a keda awe sin skirbi tocante esaki pero sperando di curazon cu emisoranan di nos isla lo toca e cancion e fin di siman aki awe y durante **Dia di Tata** diadomingo.

Esaki special tambe pa **Angelo**

su tata y tambe pa nos **Tata di Cultura "Padu del Caribe"**, e compositor y pa tur tata di **Aruba**.

Kico e cancion ta menciona den su palabranan?

Ta hopi nomber e por tin manera Papa of Papay.

Tin yiu cu tambe ta yame Papi, Pai of Pa.

Den seno di un bon hogar den cual ta reina paz y amor, su yiu-nan ta respete y mas ainda ta stime

Awe Dia di tata nos ta canta..., nos ta canta contento na bo honor.

Nos ta pidi na Dios cu ta den cielo duna bo forza salud y bendicion

dunabo forza salud y bendicion.

Y dunabo bo pan di cada dia y libra bo di cay den tentacion.

Y pa e tata cu a coi caminda malo nos ta pidi Bo, Oh Dios, pa bo salbe.

Nos ta pidi Bo, Oh Dios, pa pordone.

Angelo a lucha hopi pa a yega unda e ta awe den mundo di canto y ta di admira con el a persevera te logra di ta un di e voznan regular cu nos ta scucha den e diferente festivalnan anual di nos isla.

Mi no por keda sin manda un pabien grandi na **"Sparkle Angelo M.C. Koolman"** cu e bunita CD aki di cual mi ta sigur cu hopi hende lo keda encanta cu e cancion, su musica y e canto ora nan scuche.

Juby Naar